

摘藻堂四庫全書薈要

史部

欽定四庫全書叢要

史部

通志卷三十八

九



詳校官員外郎

臣

楊世綸

欽定四庫全書薈要卷八千九百三十七

史部

通志卷三十八

宋右迪功郎鄭樵漁仲撰

天文畧第一

總序 東方七宿 北方七宿 西方七宿 南

方七宿

天文序

堯命羲和揭星鳥星火星虛星昴之象以示人使人知

二至二分以行四時不幸而占候之說起持吉凶以惑人紛紛然務為妖妄是以刑網禁之臣謹按占候之學起於春秋戰國其時所謂精於其道者梓慎裨竈之徒耳後世之言天者不能及也魯昭公十七年冬有星孛於大辰西及漢裨竈言於子產曰宋衛陳鄭將同日火若我用瓘斚玉瓚鄭必不火子產弗與明年五月壬午四國皆火裨竈曰不用吾言鄭又將火鄭人請用之子產復弗與子太叔咎之曰寶以保民子何愛也子產曰

天道遠人道邇竈焉知天道是亦多言矣豈不或信卒弗
與亦不復火昭公二十四年五月乙未朔日有食之梓慎
曰將水昭子曰旱也日過分而陽猶不克克必甚能無旱
乎是秋大旱如昭子之言夫災旱易推之數也慎竈至精
之術也而或中或否後世之愚瞽若之何而談吉凶知昭
子之言則知陰陽消長之道可以理推不可以象求也知
子產之言則知言而中者亦不可聽況於不中者乎臣之
所作天文書正欲學者識垂象以授民時之意而杜絕其

妖妄之源焉聊舉二條以為證臣舊作圖譜志謂天下之
大學術者十有六皆在圖譜無圖有書不可用者天文是
其一也而歷世天文志徒有其書無載象之義故學者但
識星名不可以仰觀雖有其書不如無也隋有丹元子者
隱者之流也不知名氏作步天歌見者可以觀象焉王希
明纂漢晉志以釋之唐書誤以為王希明也天文籍圖不
籍書然書經百傳不復訛謬縱有訛謬易為考正圖一再
傳便成顛錯一錯愈錯不復稽尋所以信圖難得故學者

不復識星臣向嘗盡求其書不得其象又盡求其圖不
得其信一日得步天歌而誦之時素秋無月清天如水
長誦一句凝目一星不三數夜一天星斗盡在胸中矣
此本只傳靈臺不傳人間術家秘之名曰鬼料竅世有
數本不勝其訛今則取之仰觀以從稽定然步天歌之
言不過漢晉諸志之言也漢晉志不可以得天文者謂
所載者名數災祥叢雜難舉故也步天歌句中有圖言
下見象或約或豐無餘無失又不言休祥是深知天者

今之所作以是為本舊於歌前亦有星形然流傳易訛所當削去惟於歌之後採諸家之書以備其書云

東方

角兩星南北正直著中有平道上天田總是黑星兩相連別有一鳥名進賢平道右畔獨淵然最上三星周鼎形角下天門左平星雙雙橫於庫樓上庫樓十星屈曲明樓中五柱十五星三三相著如鼎形其中四星別名衡南門樓外兩星橫

角二星十二度為主造化萬物布君之威信謂之天
闕其間天門也其內天庭也故黃道經其中七曜之
所行也其星明則太平芒動則國不寧日食右角國
不寧月食左角天下道斷金火犯有戰敵金守之大
將持政左角為天田為理主刑其南為太陽道五星
犯之為旱右角為將主兵其北為太陰道五星犯之
為水蓋天之三門猶房之四表也左右角間二星曰
平道為天子八達之衢明正則吉動搖則法駕有虞

天田主天子畿內封疆金守之主兵火守之主旱水
守之主潦平道西一星曰進賢在太微宮東明則賢
者在位暗則在野又曰主卿相舉逸才周鼎三星在
攝提西國之神器也不見或移徙則運祚不寧天門
二黑星在平星北角之南主天之門為朝聘待客之
所明則四方歸化不見則兵革起邪佞生平星二星
在庫樓北平天下之法獄事廷尉之象也庫樓十星
其六大星為庫南四星為樓在角南一曰天庫兵車

之府也旁十五星三三而聚者柱也中央四小星衡也主陳兵其占曰庫中星不見兵四合無星則下臣謀上明而動搖則兵出四方盡不見則國無君南門二星在庫樓南天之外門也主守兵明則遠方入貢暗則夷狄畔客星守之主兵至

亢四星恰如彎弓狀大角一星直上明折威七子亢下橫大角左右攝提星三三相似如鼎形折威下左頓頑星兩箇斜安黃色精頑西二星號陽門色若頓頑直下

存

亢四星九度日月之中道主天子內朝天下之禮法也又曰總攝天下奏事聽訟理獄錄功者也一曰䟽廟主疾疫其星明大四海歸王輔臣納忠人無疾疫移動多病不見則天下鼎沸而旱澇作矣大角一星在攝提間天王坐也又為天子梁棟金守之則兵起日月食主凶亢南七黑星曰折威主斬殺金火守之夷狄犯邊將有棄市者攝提六星直斗杓之南主建

時節伺機祥攝提為盾以夾擁帝坐也主九卿明大
三公恣橫客星入之聖人受制一曰大臣之象頓頑
二星在折威東南主考因情狀察詐偽也陽門二星
在庫樓東北主邊塞險阻之地客星出陽門夷狄犯
邊

氐四星似斗側量米天乳氐上黑一星世人不識稱無
名一箇招搖梗河上梗河橫列三星狀帝席三黑河之
西亢池六星近攝提氐下衆星騎官出騎官之衆二十

七三三相連十欠一陣車氏下騎官次騎官下三車騎位天輻兩星立陣傍將軍陣裏振威霜

氏四星十六度下二尺為五星日月中道為天子之路寢明則大臣妃后奉君不失節如不見或移動則臣將謀內禍亂生矣日月食主內亂木犯之立后妃火犯臣僭上金犯拜將水犯百官憂客星犯婚禮不整彗孛犯暴兵起月暈人不安一曰氏為后妃之府休解之房前二星適也後二星妾也將有徭役之事氏先

動星明大則民無勞天乳在氐北主甘露明則潤澤
甘露降招搖一星在梗河北次北斗柄端主胡兵芒
角變色搖動則兵革大起梗河二星在大角北天子
以備不虞其色變動有兵喪帝席三星在大角西北
天子宴樂獻壽之所其星不見大人失位亢池六黑
星為汎舟楫主迎送移徙則凶騎官二十七星在氐
南天子騎士之象星衆則安不見兵起車騎三黑星
在氐南騎官之下車騎之將也金火犯為災動搖車

騎行天輻兩黃星在房西主鑾駕客星來守之則輦
輟有憂也騎陣將軍一星在騎官東南主騎將也搖
動則騎將出

房四星直下主明堂鍵閉一黃斜向上鈎鉤兩箇近其
傍罰有三星植鍵上兩咸夾罰似房狀房下一星號為
日從官兩箇日下出

房四星六度為明堂天子布政之宮也亦四輔也下
第一星上將也次次將也次次相也上星上相也南

二星君位北二星夫人位又為四表中間為天衢之大道亦謂之天闕黃道之所經也南間曰陽環亦曰陽道其南曰太陽北間曰陰間亦曰陰道其北曰太

陰七曜由乎天衢則天下平和由陽道則主旱喪由陰道則主水兵房星亦曰天駟為天馬主車駕南星曰左驂次左服次右服次右驂亦曰天廐又主開閉為蓄藏之所由也房星明則王者明驂星大則兵起星離則人流日月食主昏亂權臣橫彗孛犯之兵起

下二星為陰五星犯之為水上二星為陽五星犯之
為旱房北二小星曰鈎鈐房之鈐鍵天之管籥主閉
藏鍵天心也王者孝則鈎鈐明近房天下同心遠則
天下不和王者絕後房鈎鈐間有星及疎坼則地動
河清東咸西咸各四星在房心北日月五星之道也
為房之戶所以防淫佚也明則吉暗則凶日月五星
犯守之有陰謀火守之兵起罰三星在東咸正西南
北而列主受金贖罪正而直列則法令大平曲而斜

列則刑罰不中日一星在房中道前太陽之精主明德金火犯守之有憂從官二星在積卒西北

心三星中央色最深下有積卒共十二三三相聚心下是

心三星六度一名大火天王位也中星曰明堂為大辰天子之正位也前星為太子不明則太子不得位後星為庶子明則庶子繼心上四尺為日月五星之中道中心明則化成道昌直則地動移徙不見國亡

又曰心變黑色大人有憂直則主失勢動則國有憂
離則民流金火犯血光不止土木犯吉日月食吉月
暈兵起火來守之國無主客星及孛犯天下兵荒積
卒十二星在房心西南五營軍士也微而小則吉明
大動搖兵大起一星亡兵出二星亡兵半出三星亡
兵出盡他星守之兵大起近臣誅

尾九星如鉤蒼龍尾下頭五點號龜星尾上天江四橫
是尾東一星名傳說傳說東畔一魚子尾西一室是神

宮所以列在后妃中

尾九星十九度后妃之府後宮之長也北之一丈為
天之中道上第一星后也次三星夫人次則嬪妾第
三星傍一星名曰神宮解衣之內室尾亦為九子星
色欲均明大小相承則后妃無妬忌後宮有叙多子
孫星微細暗后有憂疾踈遠則后失勢動移則君臣
不和天下亂就聚則大水木犯之及月暈則后妃死
火犯宮中內亂土犯吉水犯宮中有事客星犯大臣

誅日月食主飢一曰金火守之後宮兵起龜五星在
尾南漢中主占定吉凶明則君臣和不明為乖戾亡
則赤地千里火守之兵起在外守之兵罷天江四星
在尾之北主太陰不欲明明而動水暴出參差則馬
貴其星不具則津河關道不通熒惑守之有立主客
星入河津絕傳說一星在尾後河中主後宮女巫祝
祀神靈祈禱子孕故曰主王后之內祭祀以求子孫
也詩云克禋克祀以弗無子即此之象也其星明大

王者多子孫小而暗後宮少子動搖則後宮不安星
搖則天子無嗣魚一星在尾後河中主陰事知雲雨
之期也大明則陰陽和風雨時暗則魚多亡動搖則
大水暴出出漢中則大魚多死火守在南則旱在北
則水起

臣謹按傳說一星惟主後宮女巫禱祠求子之事謂
之傳說者古有傳母有保母傳而說者謂傳母喜之
也今之婦人求子皆祀婆神此傳說之義也偶商之

傳說與此同音諸子百家更不詳審其義則曰傳說騎箕尾而出殊不知箕尾專主後宮之事故有傳說之佐焉

箕四星形狀如簸箕天舌二星箕口是箕下三星木杵隨箕前一黑是糠粃明則歲豐暗為饑

箕四星十一度亦謂之天津後宮妃后之位上六尺為天之中道箕一曰天箕主八風凡日月宿在箕東壁異軫者風起又主口舌主客蠻夷胡貊故蠻夷將

動先表箕焉星大明直則五穀熟君無讒間踈暗則
無君世亂五穀貴蠹夷不伏内外有差就聚細微天
下憂動則蠹夷有使來離徙則人流若移入河國災
人相食月暈金火犯之兵起流星犯大臣叛日宿其
野風起杵三星在箕南主杵舂之用也縱為豐橫為
飢移徙人失業不見人相食客星入杵白天下有急
變糠一星在箕口前杵白西北明則為豐暗則為饑
不見人相食

北方

斗六星其狀似北斗魁上建星三相對天弁建上三三
九斗下圓安十四星雖然名鼈貫索形天雞建下雙黑
星天籥柄前八黃精狗國四方雞下生天淵十星鼈東
邊更有兩狗斗魁前農家丈人狗下眠天淵十黃狗色
玄

斗六星二十五度天廟也亦曰天機五星貫中日月
正道為丞相太宰之位酌量政事之宜褒進賢良稟

授爵祿又主兵南二星魁天梁也中央二星天相也
北二星杓天府庭也亦為壽命之期將有天子之事
占於南斗星盛明君臣一心天下和平爵祿行芒角
動搖天子愁兵起移徙其臣逐日月五星逆入斗天
下流蕩孛犯之兵起星小暗則廢宰相及死鬣十四
星在南斗南鬣為水蟲為太陰有星守之白衣會主
有大水火守之旱建六星在斗背亦曰天旗臨於黃
道天之都闕也建斗之間七曜之道建為謀事為天

鼓為天馬南二星天庫也中央二星市也鈇鑕也上
二星旗跗也建動搖則人勞月暈之蛟龍見牛馬疫
月食五星犯守大臣相譖臣謀主亦為闕梁不通有
大水天弁九星在建星北入河中市官之長也主列
肆闐闐若市籍之事以知市珍也星明則吉彗星犯
守之糴貴兵起天雞二星在狗國北主候時也金火
守入兵大起天籥八星在斗南斗杓西主鐸籥闐闐
明吉暗凶狗國四星在建東北主鮮卑烏丸沃沮明

則邊寇作金火犯守外夷有變太白逆守之其國亂
客星守犯之有大盜其王且來天淵十星在鼈東南
一曰天海主漑灌火守之大旱水守之大水一曰主
海中魚鼈狗二黑星在斗魁前主吠守禦奸回也不
居常處為大災農丈人一星在南斗西南老農主稼
穡也其占與糠畧同

牛六星近在河岸頭頭上雖然有兩角腹下從來欠一
脚牛下九黑是天田田下三三九坎連牛上直建三河

鼓鼓上三星號織女左旗右旗各九星河鼓兩畔右邊
明更有四黃名天桴河鼓直下如連珠羅堰三烏牛東
居漸臺四星似口形輦道東足連五丁輦道漸臺在何
許欲得見時近織女

牛六星七度天之闕梁日月五星之中道主犧牲其
北二星一曰即路一曰聚火又曰上一星主道路路次
二星主闕梁次三星主南越甘氏曰上二星主道路
次二星主闕梁次二星主南夷中一星主牛移動則

牛多殃明大則王道昌其星曲則糴貴又曰星明大則闕梁通牛貴怒則馬貴不明失常穀不登細則牛賤中星移上下牛多死小星亡則牛多疫月暈損犢金火犯之兵災水土犯之吉天田九星牽牛南太微東主天子畿內之田其占與角之天田同九坎九星在天田東主溝渠所以導達泉源疏瀉盈溢明盛則有水災夷狄侵邊不明則吉河鼓三星在牽牛北天鼓也主軍鼓及鈇鉞一曰三武主天子三將軍中央

大星為大將軍左星為左將軍右星為右將軍左星南星也所以備關梁設險阻而拒難也明大光潤將軍吉動搖差度亂兵起直則將有功曲則將失律左旗右旗各九星在河鼓左右皆天之旗鼓也旗星明潤將軍吉動搖兵起怒則馬貴旗端四星南北列曰天桴鼓桴也星不明漏刻失時動搖軍鼓用桴鼓相直亦然織女三星在河北天紀東端天女也主果蓏絲綿珍寶也王者至孝神祇咸喜則織女星俱明天

下和平大星怒角布帛貴又曰三星俱明女功善暗而微天下女功廢不見兵起東足四星曰漸臺臨水之臺也主刻漏律呂之事西足五星曰輦道天子嬉遊之道金火守之御路兵起羅堰三星在牽牛東主隄塘壅蓄水潦灌溉田苗大而明大水泛溢

臣謹按張衡云牽牛織女七月七日相見者即此也爾雅云河鼓謂之牽牛又歌曰東飛百勞西飛燕黃姑織女時相見黃姑即河鼓也音訛耳

女四星如箕主嫁娶十二諸國在下陳先從趙國向東
論東西兩周次二秦雍州南下雙鴈門代國向西一晉
伸韓魏各一晉北輪楚之一國魏西屯楚城南畔獨燕
軍燕西一郡是齊隣齊北兩邑平原君欲知鄭在越下
存十六黃星細區分五箇離珠女上星敗爪珠上匏瓜
生兩箇各五瓠瓜明天津九箇彈弓形兩星入牛河中
橫四箇奚仲天津上七箇仲側扶筐星

女四星十一度下九尺為日月中道天之少府也謂

之須女者須賤妾之稱婦職之卑者也主婦女之位
其星如婦功之式主布帛裁製嫁娶星明天下豐女
功昌小暗則國藏虛移動則婦女受殃產死者多后
妃廢日月食國憂木犯立后火犯女喪金犯災土孛
犯損蠶月暈婦人災又曰水守之萬物不成火守之
布帛貴人多死土守之有女喪金守之兵起十二國
有十六星齊一星在九坎之東齊北二星曰趙趙北
一星曰鄭鄭北一星曰越越東二星曰周周東南北

列二星曰秦秦南二星曰代代西一星曰晉晉北一
星曰韓韓北一星曰魏魏西一星曰楚楚南一星曰
燕其星有變各以其國離珠五星在須女北須女之
藏府也為女子之星非其故後宮亂客星犯之後宮
凶匏瓜五星在離珠北主陰謀主後宮主果食明則
歲熟微則后失勢瓜果不登客星守之魚鹽貴旁五
星曰敗瓜主種植與匏瓜畧同天津九星在虛危北
橫漢中津梁所度明而動則兵起如流沙死人如亂

麻參差不齊馬貴一星不備關梁不通三星不備覆
陷天下星亡水災河溢水賊稱王奚仲四星在天津
北古車正也金火守之兵車必起扶筐七星在槍棹
東主蠶事見吉不見則凶

臣謹按天之所覆者廣而華夏所占者牛女下十二
國耳牛女在東南故釋氏謂華夏為南瞻部洲其二
十八宿所管者多十二國之分野隨其所隸耳

虛上下各一如連珠命祿危非虛上呈虛危之下哭泣

星哭泣雙雙下壘城天壘團圓十三星敗白四星城下
橫白西三箇離瑜明

虛二星九度少彊冢宰之官也主邑居廟堂祭祀之
事又主風雲死喪下九尺為天之中道明靜則天下
安動搖則有死喪哭泣日月食兵起流星犯賊亂宗
廟五星犯有災虛北二星曰司命主舉過行罰滅不
祥又北二星曰司祿主爵祿增年延德故在六宗之
祠司危二星在司祿之北主矯枉失司非二星在司

危之北主察愆過凡此四司皆黑星明大為災居常則平虛南二星曰哭主號哭也哭東二星曰泣主死明則國多哭泣金火守之亦然泣南十三星曰天壘城如貫索形主北夷丁零匈奴敗白四星在虛危南知凶災他星守之饑兵起秦代東三星南北列曰離瑜離袿衣也瑜玉飾皆婦人之服也星微則後宮儉約明大則婦人奢

危三星不直曲為之危上五黑號人星人畔三四杵白

形人上七烏號車府府上天鉤九黃晶鉤下五鵠宇造
父危下四星號墳墓墓下四星斜虛梁十箇天錢梁下
黃墓傍兩星名蓋屋身著皂衣危下宿

危三星十六度主天府曰天市主祭屋甘氏云為天
市廟堂下九尺為天之中道主祭屋受藏風雨墓墳
祠祀如動則天下大動土功張衡云虛危等為死喪
哭泣之事亦為邑居廟堂祠祀之事冢宰之官動則
死喪哭泣火守則天子將兵金守則饑饉兵起虛危

動則有土功火守則兵起水守則下謀上一云危動
而不明土功兵草起月暈日月五星犯即有災車府
東南五黑星曰人星有如人象主靜衆庶柔遠能邇
一曰卧星主防淫不見則人有詐行詔書明則人安
暗凶内杵三星在人星旁主軍糧正直下白吉不相
當糧絕不直民饑凶白四星在人星東南主春白覆
則大饑仰則大豐隋志云客星入杵白兵起天下聚
米天津東南七星曰車府東近河邊抵司非主官車

之府金火守之兵車大動天鉤九星如鉤狀在造父
西河中主乘輦服飾法式直則地將動明則服飾正
也傳舍南河中五星曰造父御官也一曰司馬或曰
伯樂星亡馬大貴明則吉墳墓四星在危下如墓形
主喪葬之事明則多死亡虛梁四星在蓋屋南主園
陵寢廟非人所處故曰虛梁金火守入犯兵災大起
天錢十星在北落西北主錢帛所聚星明則府藏盈
不爾虛耗金火守之兵盜起蓋屋二星在危南主天

子所居室亦為宮室之官金守之國兵起彗孛尤甚也

室兩星上有離宮出遠室三隻有六星下頭六箇雷電形壘壁陣次十二星十二兩頭大似升陣下分布羽林軍四十五卒三為羣東西兩下多難論子細歷歷看區分三粒黃金名鈇鉞一顆真珠北落門門東八魁九箇子門西一宿天綱是電傍兩黑土功吏騰蛇室上二十二

室二星十七度亦謂之營室甘氏云為太廟天子之宮也石氏謂之元宮一曰清廟又為軍糧之府及土功事星明國昌小不明祠祀鬼神不享國多疾疫動則有土功兵出野離宮六星兩兩居之分布室壁之間天子之別宮也主隱藏休息之所金火守入則兵起室南六星曰雷電主興雷動蟄明或動則震雷作壁陣十二星在羽林北橫列營室之南羽林之垣壘也星衆而明則安寧希而動則兵革起不見天下亂

五星入天軍皆為兵起金火水尤甚羽林四十五星
三三而聚散在營室之南天軍也主軍騎又主翼王
也星衆而明則安寧希而動則兵革起不見天下亂
金火水守入兵起斧鉞三星亦曰斧鑕在八魁西北
主誅夷不明則斧鑕不用移動則兵起有星入之皆
為大臣誅北落師門一星在羽林西南天之蕃落也
亦曰天軍蕃之候門長安北門曰北落門以象此也
主非常以候兵明大則軍安微弱則兵起金火守之

有兵災一曰有星守之虜入塞北落東南九黑星曰
八魁主張捕禽獸之官也客星入之多盜賊兵起金
火入亦然北落西南一星曰天網主武帳天子游獵
之所會金火守兵起室西南二星曰土功吏主土功
之官也動搖則有脩築之事隋志土功吏主司過度
騰蛇二十二星在營室北若盤蛇之狀居於河濱謂
之天蛇星主水蟲微則國安明則不寧移南大旱移
北大水客星守之水雨為災水物不收

壁兩星下頭是霹靂霹靂五星橫著行雲雨次之口四方壁上天廐十圓黃鉄鑽五星羽林傍土公兩黑壁下藏

壁二星九度下九尺為天之中道主文章天下圖書之秘府也亦主土功明則圖書集道術行小人退君子進星失色大小不同天子重武臣賤文士圖書隱親黨回邪用星動則有土功離徙就聚為田宅事日月食損賢臣五星孛犯兵起土公西南五星曰霹靂

主興雷奮擊明而動用事不明凶霹靂南四星曰雲
雨明則多雨水火守之大旱天廐十星在東壁北蒼
天馬之廐今之驛亭也不見則天下道斷鉄鑕五星
在天倉西南刈具也主斬芻飼牛馬明則牛馬肥微
暗則牛馬饑餓并死喪也

西方

奎腰細頭尖似破鞋一十六星遠鞋生外屏七烏奎下
橫屏下七星天淵成司空右畔土之精奎上一宿軍南

門河中六箇閣道形附路一星道傍明五箇吐花王良星良星近上一策名

奎十六星十六度天之武庫也石氏謂之天豕亦曰封豕主兵九尺下為天之中道又主溝瀆西南大星所謂天豕目亦曰大將明則天下安動則兵亂客星守入兵起金火守有水災隋志云若帝淫佚政不平則奎有角角動則有兵不出年中或有溝瀆之事又曰奎中星明水大出日月食五星犯皆有凶奎南七

星曰外屏以蔽天溷也占與天囷同天溷七星在外
屏南天之廁也不見則人不安移徙亦然天溷南一
星曰土司空主水土之事大而黃明天下安若客星
入之多土功天下大疫軍南門一星在天將軍西南
主誰何出入動搖則軍行不見則兵亂閣道六星在
王良前飛道也從紫宮至河神所乘也一曰主道里
張衡云天子遊別宮之道一曰王良旗一曰紫宮旗
亦所以為旌表而不欲其動搖一星不具則輦道不

通動搖則宮掖之內兵起附路一星在閣道南傍別道也備閣道之敗傷而乘之也一曰太僕主禦風雨亦遊從之義也一曰占與閣道同王良五星在奎北居河中天子奉車御官也其四星曰天駟旁一星曰王良亦曰天馬其星動為策馬故曰王良策馬車騎滿野亦曰王梁梁為天橋主禦風雨水道故或占津梁其星移主有兵亦曰馬病客星守之橋不通金火守之皆為兵憂前一星曰策王良之御策也主天子

僕御在王良旁若移在馬後是為策馬

婁三星不勻近一頭左更右更烏夾婁天倉六箇婁下頭天庾四星倉東脚婁上十一將軍侯

婁三星十二度下九尺為日月中道亦為天獄主苑牧犧牲供給郊祀亦為興兵聚眾動搖則聚眾星直則有執主之命者就聚國不安金火守之則宮苑之內兵起日月食宮內亂金木火土犯凶水犯吉孛犯起兵月暈兩軍各退左更五星在婁東山虞也主知

山澤林藪之事亦主仁智右更五星在婁西牧師也
主官養牧牛馬亦主禮義金火守之山澤有兵其占
兩更同兩更者秦爵名天倉六星在婁南倉穀所藏
也星黃而大歲熟東南四星曰天庾積廚粟之所也
天將軍十一星在婁北主武兵中央大星天之大將
也外小星吏士也大將星搖兵起大將出小星不具
兵起

胃三星鼎足河之次天廩胃下斜四星天囷十三如乙

形河中八星名太陵陵北九箇天船名陵中積尸一箇
星積水船中一黑精

胃三星十五度天之儲藏五穀之倉也又名大梁明
則四時和平天下晏然倉廩實不明則上下失位星
小則少穀輸運又云動則有輸運事就聚則穀貴人
流暗則凶荒五星犯日月食孛侵並有災天棊四星
在昴南一曰天唐張衡云主積蓄黍稷以供享祀春
秋所謂御廩也天囷十三星在胃南名廩之廟主給

御糧也明而黃則歲豐微變常色則不吉金火守之
即災起太陵八星在胃北主陵墓明而大或中星多
則天下多死喪或兵起天船九星在太陵之北居河
中一曰舟星主渡亦主水旱不在河中津河不通水
泛溢中四星欲其均明即天下安不則兵若喪移徙
亦然客彗出入為大水有兵太陵中一星曰積尸明
則死人如山張衡云一名積廩積尸明而大或其傍
星多則天下多死喪或兵起若不見而暗皆吉火守

則天下大哭泣天船中一星曰積水主候水災

昂七星一聚實不少阿西月東各一星月下五黃天陰
名陰下六烏芻葉營營南十六天苑形河裏六星名卷
舌舌中黑點天譴星礪石舌傍斜四丁

昂七星十一度下為日月中道天之耳目也主西方
主獄事又為旄頭胡星也又主喪甘氏云主口舌奏
對若明大則君無佞臣天下安和暗小則佞者被誅
搖動君信譴殺忠良張衡云昂明則獄訟平暗則刑

罰濫六星與大星等大水有白衣會七星黃兵大起
動搖有大臣下獄大而盡動若跳躍者胡兵大起一
星不見皆憂兵之象也天阿一星在胃東月一星在
昴東皆黑星並主女人災福又曰天阿主察出林妖
變天陰五星在畢柄西主從天子弋獵之臣預陰謀
也不明則禁言漏洩天苑十六星在昴畢南如環狀
天子之苑囿養禽獸之所也主馬牛羊明則牛馬羊
盈希則死芻蕘六星在苑西以供牛馬之食也一曰

天積天子之藏府也星盛則歲豐穰希則貨財散張
衡云不見則牛暴死火守之則火災起卷舌六星在
昴北天譏之外主口語以知譏佞張衡云主樞機曲
而靜則賢人用直而動則譏人得志卷舌移出漢則
天下多妄言旁星繁則死人如丘山天譏一星在卷
舌中主醫巫占與從官同礪石四星在五車北主磨
礪鋒刃明則兵起如常則吉金火及客星守之兵動
畢恰似爪叉八星出附耳畢股一星光天街兩星畢背

傍天節耳下八鳥幢畢上橫列六諸王王下四皂天高
星節下團圓九州城畢口斜對五車口東西三柱任縱
橫車中五箇天潢精潢畔咸池三黑星天關一星車脚
邊參旗九箇參車間旗下直建九旂連旂下十三鳥天
團九旂天團參脚邊

畢八星十七度主邊兵主弋獵其大星曰天高一曰
邊將主四夷之尉也星明大則遠夷來貢天下安失
色則邊兵亂一星亡為兵喪動搖邊城兵起有讒臣

離徙天下獄亂就聚法令酷甘氏云畢主街巷陰雨
天之雨師也故明而移動則霖潦及街巷壅塞明而
定則天下安張衡云畢為天馬一曰日月食邊兵凶
將哀木犯有軍功昴畢間二星曰天街三光之道也
主伺候關梁張衡云主國界也街南為華夏街北為
夷狄金火守之胡夷兵起明王道正暗兵起附耳一
星在畢下天高東南隅主聽得失伺愆邪察不祥星
盛則中國微有盜賊邊候警外國反鬪兵連年合移

動則佞讒行兵大起邊尤甚入畢兵起天節八星在
畢南主使臣之所持也宣威德於四方明吉闇凶諸
王六星在五車南天漢之中主宗社蕃屏王室也明
則諸侯奉上天下安不見宗社傾危四方兵起天高
四星在參旗西北近畢此臺榭之高主遠望氣象不
見則官失其守陰陽不和五車五星三柱九星共十
四星在畢東北五車主天子五兵張衡云天子兵車
舍也西北曰天庫主太白秦也次東北星曰天獄主

辰星燕趙也次東南星曰天倉主歲星衛魯也中央

星曰司空主鎮星楚也次西南星曰卿主熒惑魏也

五星有變各以其所主而占之三柱一曰三泉

即天

一曰休

即天

一曰旗

即天

五星均明柱皆具即人倉

廩實不具其國絕食兵且起五車三柱有變各以其

國占之三柱出外兵出柱入兵入柱出一月米貴三

倍期三年柱出不與天倉相近米穀運出千里柱倒

立尤甚火入守天下旱金入守兵起水入月暈不雨

則有赦天潢五星在五車中主河梁津渡之處也不見則河梁不通咸池三星在五車中天潢南魚圉也金火犯之則有大災隋志云月五星入天潢兵起道不通天下亂易政咸池明有龍墮死虎狼害人兵起天關一星在五車南畢西北亦曰天門日月五星所行之道也主邊塞事主關閉芒角有兵五星守之貴人多死移徙若與五車合大將軍披甲參旗九星在參西五車之間天旗也明而希則邊寇不動不

然反是隋志參旗一曰天旗一曰天弓主司弓弩之
張候變禦難玉井西南九星曰九旂天子之旗也主
邊軍進退金火守之兵亂起天苑之南十三星曰天
園植果菜之所也曲而鉤則果菜熟不然則否

觜三星相近作參星觜上座旗直指天尊卑之位九相
連司怪曲立座旗邊四鵠大近井鉞前

觜三星一度在參之右角如鼎足形主天之闡明大
則天下安五穀熟移動則君臣失位天下旱隋志云

甯觴為三軍之候行軍之藏府主葆旅收斂萬
物明則軍儲盈將得勢動而明盜賊羣行葆旅起動
移將有逐者張衡云葆旅野生之可食者金火來守
國易政兵起災生日食臣不忠月食君害臣五星犯
災生孛客星犯兵起座旗九星在司怪西北主別君
臣尊卑之位明則國有禮暗則反是司怪四星在井
鉞前候天地日月星辰禽獸蟲蛇草木之變與天高
占同

參總有十星腎相侵兩肩覆足三為心伐有三星足裏
深玉井四星右足陰屏星兩肩井南襟軍井四星屏上
吟左足下四天厠臨厠下一物天屎沉

參十星十度上為日月五星中道甘氏曰參為忠良
孝謹之子明大則臣忠子孝安吉移動殺忠臣一曰
參伐一曰大辰一曰天市一曰鈇鉞主斬刈又為天
獄主殺伐又主權衡所以平理也又主邊城為九譯
故不欲其動也參白獸之體其中三星橫列三將也

東北曰左肩主左將西北曰右肩主右將東南曰左
足主後將軍西南曰右足主偏將軍故黃帝占參應
七將中央三小星曰伐天之都尉也主胡鮮卑戎狄
之國故不欲明又曰七將皆明天下兵精也王道缺
則芒角張伐星明與參等大臣謀亂兵起參星失色
軍散敗參芒角動搖邊候有急天下兵起又曰有斬
伐之事參左足入玉井中兵大起秦地大水若有喪
山石為怪參足若突出玉井則虎狼暴害人差戾王

臣貳金火未守則國易政兵起災生日月食則田荒
米貴五星犯災甚玉井四星在參西右足下水象也
屏二星在玉井南屏為屏風客星入之四足蟲大疾
人亦多死不見則國內寢疾玉井東南四星曰軍井
行軍之井也軍井未達將不言渴名取此也又曰主
軍營之事天厠四星在屏東溷也主天下疾病黃吉
青赤白皆凶不見與屏同天厠一星在厠南色黃則
吉他色皆凶

南方

井八星橫列河中淨一星名鉞井邊安兩河各三南北
正天樽三星井上頭樽上橫列五諸侯侯上北河西積
水欲覓積薪東畔是鉞下四星名水府水位東邊四星
序四瀆橫列南河裏南河下頭是軍市軍市圓圓十三
星中有一箇野雞精孫子丈人市下列各立兩星從東
說闕丘二箇南河東丘下一狼光蒙茸左畔九箇彎弧
弓一矢擬射頑狼曾有箇老人南極中春秋出入壽無

窮

井八星三十四度甘氏云井八星在河中主泉水日月五星貫之為中道石氏謂之東井亦曰天井主諸侯帝戚三公之位故明大則封侯建國搖動失色則誅侯戚廢戮三公帝師受殃矣張衡云天之南門也黃道所經為天之亭侯主水衡事法令所取平也王者用法平則井明而端列鉞一星附井之前主伺奢淫而斬之故不欲其明大與井齊或搖動則天子用

鉞於大臣月宿井有風雨之應又曰井為天子府暗
芒并日月食五星逆犯大臣謀亂兵起中有六星不
欲大明明即水災南北兩河各三星分夾東井一曰
天高天之闕門主闕梁南河曰南戌一曰南宮一曰
陽門一曰越門一曰權星主火北河曰北戌一曰北
宮一曰陰門一曰胡門一曰衡星主水兩戌之間三
光之常道也河戌動搖中國兵起張衡云河南星不
具則南道不通北亦如之動搖及火守中國兵起天

樽三星在五諸侯南主盛饘粥以給酒食之正也張
衡云以給貧餒明則豐暗則荒或言暗吉五諸侯五
星在東井東北近北河主刺舉戒不虞又曰治陰陽
察得失亦曰主帝心一曰帝師二曰帝友三曰三公
四曰博士五曰太史又曰五曰大夫此五者常為帝
定疑議星明大潤澤則天下大治芒角則禍在中張
衡又曰五諸侯治陰陽察得失明而潤大小齊等則
國之福又曰赤則豐暗則荒積水一星在北河北所

以供酒用也不見為災又曰主候水災積薪一星在積水東以備庖厨之用明則人主康火守之大旱水府四星在東井西南水官也占與水位同水位四星在東井東主水衡又主瀉溢流也故巫咸氏贊曰水位四星瀉溢流移動近北河則國沒為江河若水火及客星守犯之百川盈溢四瀆四星在東井南軒轅東以江河淮濟之積精也明大則水泛溢軍市十三星如錢狀在參東南天軍貨易之市客星及金火守

之軍大飢野雞一星在軍市中主變怪也以芒角動

搖為兵災移出則諸侯兵起軍市西南二星曰丈人

丈人東二星曰子子東二星曰孫丈人主壽考之臣

不見人臣不得通子與孫皆侍丈人之側相扶而居

不見為災守常無咎闕丘二星在南河東主象魏天

子之震闕諸侯之兩觀也金火守之兵戰闕下狼一

星在天市東南為野將主殺掠色有常不欲變動角

而變色動搖盜賊作胡兵起人相食躁則人主不靜

不居其宮馳騁天下張衡云居非其處則人相食色
黃白而明吉黑凶赤芒角兵起金火守之亦然弧矢
九星在狼東南天弓也以備盜賊常向狼弧矢動搖
不如常者多盜賊明則兵大起狼弧張害及胡天下
乖亂又曰天弓張天下盡兵主與臣相謀張衡云引
滿則天下兵起老人一星在弧南一曰南極常以秋
分之旦見于丙春分之夕没于丁常以秋分候之南
郊明大則人主有壽天下安寧不見則人主憂

鬼四星冊方似木櫃中央白者積尸氣鬼上四星是燿
位天狗七星鬼下是外厨六間柳星次天社六箇弧東
倚社東一星名天紀

輿鬼四星二度為日月五星之中道主死亡疾病張
衡云主祠祀天目也又主視明察奸謀東北星主積
馬東南星主積兵西南星主積布帛西北星主積金
玉隨其變占之中央一星名積尸亦曰積尸氣者但
見氣而已主死喪祠祀一曰鈇鑕主誅斬鬼星明大

則穀成不明人散動而光上賦斂重徭役多星徙人
愁政令急鬼質欲其忽忽不明則安明則兵起大臣
謀主下流亡甘氏云積尸搖動失色則疾病鬼哭人
荒軒轅西四星曰燿亦曰烽燿主烽火備緊急占以
不明安靜明大甚則邊亭警急搖動芒角亦然又曰
明吉暗凶天狗七星在鬼西南狼之北橫河中以守
賊也移徙則兵起金火犯之人相食外廚六星在柳
南天子之外廚也占與天廚同弧南六星為天社在

老人東南似柳直明則吉隋志云共工之子句龍能平水土故祀以配社其精為星外廚之南一星曰天紀主知禽獸齒歲金火守之禽獸多死

柳八星曲頭垂似柳近上三星號為酒享宴大酺五星守

柳八星十四度上為天之中道甘氏云主飲食倉庫酒醕之位明大則人豐酒食搖動則大人酒死失色則天下不安饑饉流於道路不過三年必應張衡云

柳為朱雀之喙天之厨宰也主尚食和滋味隋志云
又主雷雨一曰天相一曰天庫一曰注又主木功星
明大臣重慎國安厨食具注舉首王命興輔佐出星
直天下謀伐其主就聚兵闢國門酒旗三星在軒轅
右角之南酒官之旗也主享宴飲食五星守酒旗天
下大酺有酒肉財物之賜及爵宗室

星七星如鈎柳下生星上十七軒轅形軒轅東頭四內
平平下三箇名天相相下稷星橫五靈

七星七度甘氏云主后妃御女之位亦為賢士若失色芒動則后妃死賢士誅明大則道化成國盛張衡云七星為朱鳥之頸一名天都主衣裳文繡隋志云主急兵守盜賊故欲明則王道昌暗則賢良不處天下空天子疾動則兵起離則易政日食兵饑婦人災木犯人安火犯旱金土水犯俱災月暈孛犯兵起軒轅十七星在七星北黃帝之神黃龍之體也后妃之主士女職也一曰東陵一曰權星主雷雨之神南大星

女主也次北一星夫人也屏也上將也次北一星妃也次將也其次諸星皆次妃之屬也女主南小星女御也左一星少民少后宗也右一星大民太后宗也欲其色黃小而明也張衡云軒轅如龍之體主雷雨之神後宮之象焉陰陽交合盛為雷激為電和為雨怒為風亂為霧凝為霜散為露聚為雲立為虹蜺離為背喬分為抱珥此十四變皆軒轅主之其星欲小而黃明則吉移徙則國人流逆東西角張而振后敗

水火金守之女主惡也漢志曰軒轅為權太微為衡
月五星守犯者如衡占內平四星在中台南耀之北
平罪之官也明則刑罰平暗則否酒旗南三星曰天
相丞相之象也其占與相星畧同稷五星在七星之
南主農正也取乎百穀之長以為其號明大則歲大
豐不明則儉不見則人相食

張六星似軫在星旁下頭惟有天廟廊十四之星冊四
方長垣少微雖向上數星倚在太微傍太尊一星直上

黃

張六星十七度甘氏云主天廟明堂御史之位上為
天之中道若明大則國盛彊失色宗廟不安明堂宮
廢隋志云主珍寶宗廟所用及衣服又主天厨飲食
賞賚之事星明則王者行五禮得天之中動則賞賚
離徙天下有逆人就聚有兵金火守之有兵起或云
主貢物色細無光王者少子孫日食虧修禮也月食
大澇魚行人道火字犯兵起水土犯國不寧張南十

四星曰天廟天子祖廟也客星守之祠官有憂其占
與虛梁同長垣四星在少微南主界域及胡夷火守
之胡人入中國大白入之九卿謀反少微四星在太
微西南北列士大夫之位也一名處士亦天子副主
或曰博士官一曰主衛掖門南第一星為處士第二
星為議士第三星為博士第四星為大夫明大而黃
則賢士舉月五星犯守之處士女主憂宰相易

翼二十二星大難識上五下五橫著行中心六箇恰如

張更有六星在何許三三相連東西附必若不能分處
所更請向前看野取五箇黑星翼下頭欲知名字是東
甌

翼二十二星十九度甘氏云主太微三公化道文籍
失色則民流日月交食五星並逆芒動則化道不行
文籍壞滅動移則三公廢明大則化成隋志云翼為
天之樂府主俳倡戲樂又主夷狄遠客負海之濱明
大則禮樂興四夷來賓動則蠻夷使來離徙則天子

舉兵或云明則禮樂興暗則政教失日食臣僭月食婦人憂五星孛流客犯大凶東甌五星在翼之南蠻夷星也張衡云主東越穿冑南越三夷金火守之其地有兵芒角動移兵內叛

軫四星似張翼相近中央一箇長沙子左轄右轄附兩星軍門兩黃近翼是門下四箇土司空門東七烏青丘子青丘子下名器府器府之星三十二以上便是太微宮黃道向上看取是

軫四星十二度甘氏云軫七星主將軍樂府歌謠之事五星犯之失位亡國女子主政人失業賊黨掠人禍生於百日内若明大則天下昌萬民康四海歸王張衡云軫為冢宰輔臣也主軍騎明大則軍騎用一云明大則車騎動隋志云主載任有軍出入皆占於軫又主死喪明則車駕備動則車騎用離徙天子憂就聚兵大起輅兩星附軫兩傍主王侯左輅為王者同姓右輅為異姓星明兵大起遠軫凶軫輅舉南蠻

侵張衡云轄不見國有大憂長沙一星在軫之中主
壽命也長沙明則人壽長子孫盛軍門二黃星在青
丘西天子六軍之門也主營候豹尾威旗占以移其
處為道不通土司空四黃星在軍門南主土功巫咸
氏云金火犯之天下男不得耕女不得織隋志云一
曰司徒主界域青丘七黑星在軫東南主東方三韓
之國占與東甌同軫南三十二星曰器府主樂器之
府也明則樂器調理暗則有咎

通志卷三十八

欽定四庫全書薈要卷八千九百三十八

史部

通志卷三十九

宋 石 迪 功 郎 鄭 樵 漁 仲 撰

天文略第二

太微宮 紫微宮 天市垣 天漢起沒 十二

次度數 州郡躔次 七曜

太微宮

上元太微宮昭昭列象布蒼穹端門只是門之中左右

執法門西東門左皂衣一謁者以次即是烏三公三黑
九卿公背傍五黑諸侯卿後行四箇門西主軒屏五帝
內坐於中正章臣太子并從官烏列帝後從東定郎將
虎賁居左右常陳郎位居其後常陳七星不相誤郎位
陳東一十五兩面宮垣十星布左右執法是其數宮外
明堂布政宮三箇靈臺候雲雨少微四星西南隅長垣
霍霍微西居北門西外接三台與垣相對無兵災

太微垣十星在翼軫北張衡云天子之宮庭五帝之

坐十二諸侯府也其外蕃九卿也一曰軒轅為權太
微為衡衡主平也隋志云又為天庭理法平辭監升
授德列宿受符諸神考節舒情稽疑也南蕃中一星
間曰端門東曰左執法廷尉之象也西曰右執法御
史大夫之象也執法所以舉刺凶奸者也左執法之
東左掖門也右執法之西右掖門也東蕃四星南第
一星曰上相其北東太陽門也第二星曰次相其北
中華東門也第三星曰次將其北東太陰門也第四

星曰上將所謂四輔也西蕃四星南第一星曰上將
其北西太陽門也第二星曰次將其北中華西門也
第三星曰次相其北西太陰門也第四星曰上相亦
四輔也東西蕃有芒及動搖者諸侯謀天子也執法
移則刑罰尤急月五星入太微軌道吉其所犯中坐
成刑謁者一星在太微內左執法東北主贊賓客也
不見外國不賓服謁者東北三星曰三公內坐朝會
之所居也張衡云以輔弼帝者其名與夾斗三公同

三公北三星曰九卿內坐主治萬事與天紀同占九卿西五星曰內五諸侯內侍天子不之國也辟雍之禮得則太微諸侯明屏四星在端門內帝坐南近右執法屏所以擁蔽帝庭也執法主刺舉星大明潤則君臣有禮黃帝內坐一星在太微中含樞紐之神也天子動得天度止得地意從容中道則太微五帝之坐明以光黃帝坐不明人主當求賢士以輔治不然則奪勢又曰太微五帝坐小弱青黑天子國亡四帝

內坐四星夾黃帝坐東方星蒼帝靈威仰之神也南方星赤帝赤熛怒之神也西方星白帝白招矩之神也北方星黑帝叶光紀之神也張衡云五帝同明而光則天下歸心不然則失位金火水入太微若順入軌道伺其出之所守之分則為天子所誅也帝坐東北一星曰幸臣主親愛臣明則幸臣用事微細吉太子一星在幸臣西五帝坐北儲貳之星明而潤則太子賢不然則否金火守入太子不廢則為篡逆之事

從官一星在太子西北主從官不見則帝不安如常
則吉郎將一星在郎位東北所以為武備張衡云今
左右中郎將是大明芒角將怒不可當也虎賁一
星在太微西蕃之外上相之西下台之南靜室旄頭
之騎官也張衡云主侍從之武臣也與車騎同占常
陳七星如畢狀在郎位北天子宿衛虎賁之士以設
彊毅也星搖動天子自出明則武兵用微則武兵弱
郎位十五星又云二十四星在帝坐東北一曰依烏

郎位也周官之元士漢官之光祿中散騎諫議郎
三署郎中是其職也張衡又云今之尚書郎也欲其
大小相均光潤有常吉隋志郎位主守衛也其星明
大臣有劫主又曰客犯上其星不具后死幸臣誅客
星入之大臣為亂明堂三星在太微西南角外天子
布政之宮也明吉暗凶明堂西三星曰靈臺主觀雲
物察符瑞候災變也占與司怪同少微長垣二坐星
已釋在張星之次矣三台六星兩兩而居起文昌列

招搖太微一曰天柱三公之位也在天曰三台主開
德宣符也西近文昌二星曰上台為司命主壽次二
星對軒轅曰中台為司中主宗室東二星抵太微曰
下台為司祿主兵所以昭德塞違也又曰三台為天
階太一躡以上下一曰泰階上階上星為天子星下星
為女主中階上星為諸侯三公下星為卿大夫下階
上星為士下星為庶人所以和陰陽而理萬物也其
星有變各以所主占之君臣和集如其常度張衡云

色齊明而行列相類則君臣和法令平不齊為乖度
金火守入兵起彗孛尤甚也

北極紫微宮

中元北極紫微宮北極五星在其中大帝之坐第二珠
第三之星庶子居第一號曰為太子四為后宮五天樞

一云第三明者帝之居第四名曰四庶子最小第五天之樞

左右四星是四輔天一

太一當門路左樞右樞夾南門兩面營衛一十五上宰
少尉兩相對少宰上輔次少輔上衛少衛次上丞後門

東邊大贊府門西喚作一少丞以次却向前門數陰德
門裏兩黃聚尚書以次其位五女史柱史各一戶御女
四星五天柱大理兩星陰德邊勾陳尾指北極顛勾陳
六星六甲前天皇獨在勾陳裏五帝內坐後門是華蓋
并杠十六星杠作柄象蓋傘形蓋上連連九箇星名曰
傳舍如連丁垣外左右各六珠右是內階左天廚階前
八星名八穀廚下五箇天棓宿天牀六星左樞在內廚
兩星右樞對文昌斗上半月形希疎分明六箇星文昌

之下曰三公太尊只向三公明天牢六星太尊邊太陽
之守四勢前一箇宰相太陽側更有三公相西偏即是
元戈一星圓天理四星斗裏暗輔星近着開陽一本云文
昌之下三師名天牢六星四勢前更有三公相西偏即
是太陽一星圓天理四星斗裏暗輔星近着開陽

北斗之宿七星明第一主帝名樞精第二第三璇璣星
第四名權第五衡閭陽搖光六七名

北極五星在紫微宮中一名天極一名北辰其紐星
天之樞也天運無窮三光迭耀而極星不移故曰居

其所而衆星拱之第一星主月太子也第二星主日
帝王也亦為太一之坐謂最赤明者也第三星主五
星庶子也北極五星最為尊也中星不明主不用事
右星不明太子憂也其第四星為后宮第五星為天
樞張衡云二星並為後宮北極五星明大則吉變動
則憂抱極樞四星曰四輔所以輔位北極而出度授
政也張衡云抱極之細星也為輔臣之位主贊萬機
小而明吉大明及芒角臣逼君暗則官不理天一一

星在紫宮門右星之南天帝之神也主戰鬪知人吉凶者也太一一星在天一南相近亦天帝神也主使十六神知風雨水旱兵革飢饉疾疫災害所生之國也張衡云天一遍閭闔外其占明而有光則陰陽和合萬物成人主吉不然反是太一占與天一略同紫宮垣十五星其西藩七東藩八在北斗之北一曰紫微大帝之坐也天子之常居也主命主度也一曰長垣一曰天營一曰旗星為藩衛備藩臣也宮闕兵起

旗星直天子出自將宮中兵張衡云紫微垣十五星
東藩八西藩七其東藩近閭闔門第一星為左樞第
二星為上宰第三星為少宰第四星為上輔第五星
為少輔第六星為上衛第七星為少衛第八星為少
丞其西藩近閭闔門第一星為右樞第二星為少尉
第三星為上輔第四星為少輔第五星為上衛第六
星為少衛第七星為上丞皆以明大有常則吉若盛
明則內輔盛也宮垣直而明天子將兵開則兵起西

藩正南開如門象名閭闔門有流星自門而出四野者當有中使銜命視其所適分野而論之也陰德二星在紫微宮內尚書之西主施德者其占以不明為宜明則新君踐極隋志曰尚書西二星曰陰德陽德主周急振撫又分為二坐星矣門內東南維五星曰尚書主納言夙夜咨謀龍作納言比之象也張衡曰八坐大臣之象其占與四輔不殊極東一星曰柱下史主左右記君之過星明則史直辭不明反是柱下

北一星曰女史婦人之微者主傳漏故漢有侍史張
衡云婦官也主記宮內之事其占與柱史同御女下
四星在紫微宮內勾陳之北八十一御妻之象也其
占明則多內寵不明則否晉志謂之女御宮天柱五
星在紫微宮門內華蓋杠左傍近東垣北隅法五行
主晦朔晝夜之職明正則吉人安陰陽調不然則司
歷過隋志云建政教立圖法之府也常以朔望日垂
禁令於天柱以示百司周禮以正歲之月示法象魏

此之謂也大理二星在紫微門內次近陰德決獄之
官星明則刑憲平不明則冤酷深勾陳六星在紫微
宮華蓋之下隋志云後宮也大帝之正妃也大帝之
常居也張衡云大帝所居之宮也亦將軍之象也星
明則吉暗則人主惡之勾陳口一星曰天皇亦曰大
帝其神曰曜魄寶主御羣靈秉萬機神圖也其星隱
而不見見則為災六甲六星在紫微宮內華蓋杠左
傍分掌陰陽紀時節明則陰陽和不明則寒暑易節

五帝內坐五星在華蓋下勾陳上斧扈之象所以備
宸居者明正則吉變動則災凶隋志云客星犯紫宮
中坐大臣犯主華蓋七星其杠九星合十六星在勾
陳上正當大帝所以覆蔽大帝之坐也明正則吉傾
動則凶傳舍九星在華蓋上近河賓客之館主胡人
入中國客星守之備姦使亦曰胡兵起內階六星在
文昌北天皇之陞也明吉傾動凶紫微東垣北維外
六星曰天廚天子百官之廚也見吉不見凶八穀八

星在紫微西藩之外五車之北其八星一主稻二主
黍三主大麥四主小麥五主大豆六主小豆七主粟
八主麻子明則八穀皆成暗則不熟一星不見則一
穀不登八星不見則國人餬口天棓五星在女牀東
北天子先驅所以禦難也不明則國兵起一曰主爭
訟明大凶小吉天牀六星當閭闔門外主天子寢舍
解息燕休之處星正大吉君有慶傾則人主不安一
云在宮門外聽政之象也為寢舍也暗凶內厨兩星

在紫垣外西南角主六宮之內飲食府也一云主后
夫人與太子宴飲居常無咎有犯守凶文昌六星在
北斗魁前天之六府也主集計天道一曰上將大將
軍建威武二曰次將尚書正左右三曰貴相太常理
文緒四曰司祿司中司隸賞功進爵五曰司命司怪
太史主滅咎六曰司寇大理佐理實所謂一者起北
斗魁前近內階者也明潤大小齊天瑞臻張衡云其
占黃潤光明萬人安大小均天瑞降青黑細微多所

害搖動移徙大臣憂金火守入兵興孛彗犯國亂一
曰文昌動則三公受誅后崩災福與三公同三公三
星在北斗柄東又三公星在北斗魁西並為太尉司
空司徒之象主變理陰陽弼君機務其星移徙不吉
居常安金火守之三公有凶隋志曰杓南三星及魁
第一星皆曰三公宣德化調七政和陰陽之官也太
尊一星在中台之北貴戚也巫咸云聖公之象居常
為定不見則凶金犯守為災貴賤將敗者也天牢六

星在北斗魁下貴人之牢也主愆過禁暴淫與貫索
同占太陽守一星在相西大將大臣之象也主戒不
虞設武備也非其常兵起明吉暗凶移徙大臣誅勢
四星在太陽守西北刑餘人而用事者也不明吉明
即閹官擅權相一星在北斗南隋志曰相者總領百
官而掌邦教以佐帝王安邦國集衆事也明吉元戈
一星在招搖北亦曰天戈也芒角大而動則四夷兵
起其占與梗河相類北斗魁中四黑星為貴人之牢

曰天理明及搖動與有星者為貴人下獄北斗七星
輔一星在太微北七政之樞機陰陽之元本也故運
乎天中而臨制四方以建四時而均五行也魁四星
為璇璣杓三星為玉衡又曰斗為人君之象號令之
主又為帝車取乎運動之義也又魁第一星曰天樞
二曰璇三曰璣四曰權五曰玉衡六曰開陽七曰搖
光一至四為魁五至七為杓樞為天璇為地璣為人
權為時玉衡為音開陽為律搖光為星石氏云第一

曰正星主陽德天子之象也二曰法星主陰刑女主之位也三曰令星主禍害也四曰伐星主天理伐無道五曰殺星主中央助四旁殺有罪六曰危星主天倉五穀七曰部星亦曰應星主兵又云一主天二主地三主火四主水五主土六主木七主金又曰一主秦二主楚三主梁四主吳五主趙六主燕七主齊輔星附乎開陽所以佐斗成功也又曰主危正矯不平又曰丞相之象也七政星明則國昌不明國殃斗旁

欲多星則安斗中少星則人怨上天下多訟德者無
星二十日有輔星明而斗不明臣彊主弱斗明輔不
明主彊臣弱也杓南三星及魁第一星皆曰三公宣
德化調七政和陰陽之官也張衡云若天子不恭宗
廟不敬鬼神則魁第一星不明或變色若廣營宮室
妄鑿山陵則第二星不明或變色若不愛百姓驟興
征役則第三星不明或變色若發號施令不順四時
不明天道則第四星不明或變色若廢正樂務淫聲

則第五星不明或變色若不勸農桑不務稼穡峻法濫刑退賢傷政則第六星不明或變色若不撫四方面不安夷夏則第七星不明或變色凡日月暈連環及斗月暈及搖動兵起其傍及中小星多則天下不安人多怨一云小星多則天下安不然則國人散五曜及客星守入皆凶孛彗尤甚也

天市垣

下元一宮名天市兩扇垣牆二十二當門六角黑市樓

門左兩星是車肆兩箇宗正四宗人宗星一震亦依次
帛度兩星屠肆前候星還在帝坐邊帝坐一星常光明
四箇微茫宦者星以次兩星名列肆斗斛帝前依其次
斗是五星斛是四垣北九箇貫索星索口橫者七公成
天紀恰似七公形數着分明多兩星紀北三星名女牀
此坐還依織女傍三元之象無相侵二十八宿隨其陰
水火木土并與金以次別有五行分

天市垣二十二星在房心東北主權衡主聚衆一曰

天旗庭主斬戮之事也市中星衆潤澤則歲實星稀則歲虛熒惑守之戮不忠之臣又曰若怒角守之者臣殺主彗星出為徙市易都客星入之兵大起出之有貴喪張衡曰天市明則市吏急商人無利忽忽暗則反是市樓六星在市中臨箕星之上主司關闡明則吉暗則市吏不理也隋志市樓者市府也主市價律度其陽為金錢其陰為珠玉變見各以所主占之車肆二星在天市垣南門之內主車駕不明則國車

盡行隋志主衆賈之區宗正二星在帝坐東南宗大
夫也彗星守之若失色宗正有事客星守動則天子
親屬有變又曰客星守之貴人死又曰宗正明則宗
室有秩暗則國家凶宗人四星在宗正東主錄親疎
享祀如綺文而明正族人有序宗星二星在宗人東
北候星之東宗室之象帝輔血脉之臣也客星守之
宗人不和帛度二星在宗星東北主度量明則尺量
平商人不欺暗則否屠肆三星在帛度東北主烹宰

明大則肆中多宰殺候一星在帝坐東北主伺陰陽也明大輔臣彊四夷開候細微則國安亡則主失位移則主不安居常則吉帝坐一星在天市中候星西天庭也光而潤則天子吉威令行微小凶大人當之或云暗則大人不正張衡云帝坐者帝王之坐帝坐有五一坐在紫微宮一坐在大角一坐在心中一坐在天市垣一坐在太微宮咸云帝坐一曰神農所居不見則大人當其咎宦者四星在帝坐西南帝傍之

閹人也星微則吉明則凶非其常宦者有憂其占與
勢星同列肆二星在斛西北主寶玉之貨移徙則列
肆不安火守入兵大起斗五星在宦者西南主平量
覆則歲熟仰則大飢明暗與帛度同斛四星在市樓
北亦曰天斛主量者也占與斗同貫索九星在七公
前一日連索一曰連營一曰天牢主法律禁暴彊也
牢口一星為門欲其開也九星皆明天下獄煩七星
見小赦五星見大赦動則斧鑕用中空則更元漢志

云十五星張衡云貫索開有赦不見即刑獄簡若閉口及星入牢中有繫死者常以午子夜候之一星不見則有小喜二星不見賜祿三星不見人主德令行且赦若客出視其小大大有赦小有小赦或云貫索為賤人之牢一星芒有喜事二星芒賜爵祿三星芒有赦門閉牢中多死水犯災火犯米貴七公七星在招搖東天之相也三公之象張衡云七公橫列貫索之口主執法列善惡之官也星齊正則國法平差

戾則獄多冤酷或云星入河米貴火犯之兵起天紀
九星在貫索東九卿也為九河主萬事之紀理冤訟
也明則天下多辭訟亡則政理壞國紀亂散絕則地
震山崩女牀三星在天紀之北為後宮御女主女事
明則宮人恣意常則無咎

魏石申以赤點紀星共一百三十八座計八百十
星商巫咸以黃點紀星共四十四座計二百四十
四星齊甘德以黑點紀星共一百一十八座計五

百十一星三家都紀三百座計一千四百六十五
星此舊書所紀傳寫之訛數目參差無所考正

天漢起沒

臣謹按天漢舊有圖無歌故為之補

天河亦一名天漢起自東方箕尾間遂乃分為南北道
南經傳說入魚淵開籥戴弁鳴河鼓北經龜宿貫箕邊
次絡斗魁冒左旗又合南道天津湄二道相合西南行
分夾瓠瓜絡人星杵畔造父騰蛇精王良附路閣道平

登此大陵泛天船直到卷舌又南征五車駕向北河南
東井水位入吾驂水位過了東南游經次南河向闕丘
天狗天紀與天稷七星南畔天河沒

天漢起東方經箕尾之間謂之天河亦謂之漢津乃
分為二道其南經傳說魚天籥天弁河鼓其北經龜
貫箕下次絡南斗魁左旗至天津下而合南道乃西
南行又分夾瓠瓜絡人星杵造父騰蛇王良附路閣
道北端太陵天船卷舌而南行絡五車經北河之南

入東井水位而東南行絡南河闕丘天狗天紀天稷
在七星南而沒張衡云津漢者金之氣也其占曰水
漢中星多則水少則旱

十二次度數

十二次班固取三統歷十二次配十二野其言最詳又
有費直說周易蔡邕月令章句所言頗有先後魏太史
令陳卓更言郡國所入宿度今附而次之

自軫十二度至氐四度為壽星於辰在辰鄭之分野屬

兗州

費直周易分野壽星起軫七度
蔡邕月令章句壽星起軫八度

自氐五度至尾九度為大火於辰在卯宋之分野屬豫

州

費直起氐十一度
蔡邕起亢八度

自尾十度至南斗十一度為析木於辰在寅燕之分野

屬幽州

費直起尾九度
蔡邕起尾四度

自南斗十二度至須女七度為星紀於辰在丑吳越之

分野屬揚州

費直起斗十度
蔡邕起斗六度

自須女八度至危十五度為元枵於辰在子齊之分野

屬青州

費直起女六度
蔡邕起女二度

自危十六度至奎四度為娵訾於辰在亥衛之分野屬

并州

費直起危十四度
蔡邕起危十度

自奎五度至胃六度為降婁於辰在戌魯之分野屬徐

州

費直起奎二度
蔡邕起奎八度

自胃七度至畢十一度為大梁於辰在酉趙之分野屬

冀州

費直起婁十度
蔡邕起胃一度

自畢十二度至東井十五度為實沈於辰在申魏之分

野屬益州

費直起畢九度
蔡邕起畢六度

自東井十六度至柳八度為鶉首於辰在未秦之分野

屬雍州

費直起井十二度
蔡邕起井十度

自柳九度至張十六度為鶉火於辰在午周之分野屬

三河

費直起柳五度
蔡邕起柳三度

自張十七度至軫十一度為鶉尾於辰在巳楚之分野

屬荊州

費直起張十三度
蔡邕起張十二度

州郡躔次

陳卓范蠡毘谷先生張良諸葛亮譙周京房張衡並云
角亢氐鄭兗州

東郡入角一度 東平任城山陽入角六度 濟
北陳留入亢五度 濟陰入氐一度 東平入氐
七度 泰山入角十二度

房心宋豫州

潁川入房一度 汝南入房二度 沛郡入房四
度 梁國入房五度 淮陽入心一度 魯國入

心三度 楚國入心四度

尾箕燕幽州

涼州入箕中十度 上谷入尾一度 漁陽入尾
三度 右北平入尾七度 西河上郡北地遼西
東入尾十度 涿郡入尾十六度 渤海入箕一
度 樂浪入箕三度 元菟入箕六度 廣陽入
箕九度

斗牽牛須女吳越揚州

九江入斗一度 廬江入斗六度 豫章入斗十
度 丹陽入斗十六度 會稽入牛一度 臨淮
入牛四度 廣陵入牛八度 泗水入女一度
六安入女六度

虛危齊青州

齊國入虛六度 北海入虛九度 濟南入危一
度 樂安入危四度 東萊入危九度 平原入
危十一度 菑川入危十四度

營室東壁衛并州

安定入營室一度 天水入營室八度 隴西入

營室四度 酒泉入營室十一度 張掖入營室

十二度 武都入東壁一度 金城入東壁四度

武威入東壁六度 敦煌入東壁八度

奎婁胃魯徐州

東海入奎一度 琅琊入奎六度 高密入婁一

度 城陽入婁九度 膠東入胃一度

昂畢趙冀州

魏郡入昂一度 鉅鹿入昂三度 常山入昂五
度 廣平入昂七度 中山入昂八度 清河入
昂九度 信都入畢三度 趙郡入畢八度 安
平入畢四度 河間入畢十度 真定入畢十三
度

冀參魏益州

廣漢入冀一度 越雋入冀三度 蜀郡入參一

度 捷為入參三度 牂牁入參五度 巴蜀入
參八度 漢中入參九度 益州入參七度
東井與鬼秦雍州

雲中入東井一度 定襄入東井八度 鴈門入
東井十六度 代郡入東井二十八度 太原入
東井二十九度 上黨入與鬼二度

柳七星張周三輔

弘農入柳一度 河南入七星三度 河東入張

一度 河內入張九度

翼軫楚荊州

南陽入翼六度 南郡入翼十度 江夏入翼十

二度 零陵入軫十一度 桂陽入軫六度 武

陵入軫十度 長沙入軫十六度

七曜

日循黃道東行一日一夜行一度三百六十五日有奇
而周天行東陸謂之春行南陸謂之夏行西陸謂之秋

行北陸謂之冬行以成陰陽寒暑之節是故傳云日為
太陽之精主生養恩德人君之象也人君有瑕必露其
慝以告示焉故日月行有道之國則光明人君吉昌百
姓安寧日變色有暈軍破無暈喪侯王其君無德其臣
亂國則日赤無光日失色所臨之國不昌日晝昏行人
無影到暮不止上刑急下人不聊生不出一年有大水
日晝昏烏鳥羣鳴國失政日中烏見主不明為政亂國
有白衣會將軍出旌旗舉日中有黑子有黑氣黑雲乍

三年五臣廢其主日食陰侵陽臣掩君之象有亡國有死君有大水日食見星有殺君天下分裂王者修德以禳之

月者太陰之精也其形圓其質清日光照之則見其明日光所不照則謂之魄故月望之日日月相望人居其間盡覩其明故形圓也二弦之日日照其側人觀其傍故半魄也晦朔之日日照其表人在其裏故不見也其行有遲疾其極遲則日行十二度彊極疾則日行十四

度半彊遲則漸疾疾極漸遲二十七日半彊而遲疾一終矣又月行之道斜帶黃道十三日有奇在黃道表又十三日有奇在黃道裏表裏極遠者去黃道六度二十七日有奇陰陽一終張衡云對日之衝其大如日日光不照謂之闇虛闇虛逢月則月食值星則星亡今歷家月望行黃道則值闇虛矣值闇虛有表裏深淺故食有南北多少月為太陰之精以之配日女主之象也以之比德刑罰之義列之朝廷諸侯大臣之類故君明則月

行依度臣執權則月行失道大臣用事兵刑失理則月
行乍南乍北女主外戚擅權則或進或退月變色將有
殃月晝明姦邪並作君臣爭明女主失行陰國兵彊中
國飢天下謀僭數月重見國以亂亡

臣謹按丹元子二十八宿及三元之歌所以為美者
以其句中有圖言下見象而不談災祥至五行有五
篇吟則反是且五星為緯而行無定體可以算數推
難以圖象求今五行吟既無圖象之理而極論災祥

未必丹元子之作也其言濫誣在所不取

歲星曰東方春木於人五常仁也五事貌也仁虧貌失
逆春令傷木氣則罰見歲星歲星盈縮以其舍命國其
所居久其國有德厚五穀豐昌不可伐其對為衝歲乃
有殃歲星安靜中度吉盈縮失次其國有變不可舉事
用兵又曰人主出象也色欲明光潤澤德合同又曰進
退如度姦邪息變色亂行主無福又主福主大司農主
齊吳主司天下諸侯人君之過主歲五穀赤而角其國

昌赤黃而沉其野大穰張衡云歲星者東方之精蒼帝
之子一名攝提一名重華一名應星一名紀星晉灼曰
太歲在四仲則歲行三宿太歲在四孟四季則歲行二
宿二八十六三四十二而行二十八宿十二歲而周天
熒惑曰南方夏火禮也視也禮虧視失逆夏令傷火氣
罰見熒惑熒惑法使行無常出則有兵入則兵散各以
其舍命國為亂為賊為疾為喪為飢為兵所居國受殃
環繞鉤已芒角動搖變色乍前乍後乍左乍右其殃愈

甚其南丈夫北女子喪周旋止息乃為死喪寇亂其野
亡地其失行而連兵聚其下順之戰勝又曰熒惑主大
鴻臚主死喪主司空又為司馬主楚吳越以南又司天
下羣臣之過司驕奢亡亂妖孽主歲成敗又曰熒惑不
動兵不戰有誅將其出色赤怒逆行成鈞已戰凶有圍
軍鈞已有些角如鋒刀人主無出宮下有伏兵芒大則
人民怒君子遑遑小人浪浪不有亂臣則有大喪人欺
吏吏欺王又為理外則理兵內則理政為天子之理也

故曰雖有明天子必視熒惑所在其入守犯太微軒轅
營室房心主命惡之張衡云熒惑為執法之星其精為
風伯之師或童兒歌謠嬉戲晉灼曰熒惑常以十月則
入朝太微受制而出行列宿司無道出入無常也二歲
而周天

填星曰中央季夏土信也思心也仁義禮智以信為主
貌言視聽以心為政故四星皆失填乃為之動動而盈
侯王不寧縮有軍不復所居之宿國吉得地及女子有

福不可伐去之失地若有女憂居宿久國福厚易則薄
失次而上二三宿曰盈有主命不成不乃大水失次而
下曰縮后戚其歲不復不乃天裂若地動一曰填為黃
帝之德女主之象主德厚安危存亡之機司天下女主
之過又曰天子之星也天子失信則填星大動張衡云
填星者黃帝之子女主之象也一名地候晉灼曰常以
甲辰之始建斗之歲填行一宿二十八歲而周天

太白曰西方秋金義也言也義虧言失逆秋令傷金氣

罰見太白太白進退以候兵高卑遲速靜躁見伏用兵
皆象之吉其出西方失行夷狄敗出東方失行中國敗
未盡期曰過參天病其對國若經天天下革人更王是
謂亂紀人民流亡晝與日爭明彊國弱小國彊女主昌
又曰太白主大臣其號上公也大司馬位謹候此張衡
云太白者白帝之子一名火政一名官星一名明堂一
名文表一名太皞一名終星一名天相一名天浩一名
序星一名梁星一名威星一名大囂一名大爽晉灼曰

常以正月甲寅與熒惑晨出東方二百四十日而入
四十日又出西方二百四十日而入三十五日而復
出東方出以寅戌入以丑未一歲而周天

辰星曰北方冬水智也聽也智虧聽失逆冬令傷水氣
罰見辰星辰星見則主刑主廷尉主燕趙又為燕趙代
以比宰相之象亦為殺伐之氣戰鬥之象又曰軍於野
辰星為偏將軍之象無軍為刑事和陰陽應効不効其
時不和出失其時寒暑失其節邦當大饑當出不出是

謂擊卒兵大起在於房心間地動亦曰辰星出入躁疾
常主夷狄又曰蠻夷之星也亦主刑法之得失色黃而
小地大動光明與月相逮其國大水張衡云辰星一名
勾星一名爨星一名伺星晉灼曰常以二月春分見奎
婁五月夏至見東井八月秋分見角亢十二月冬至見
牽牛出以辰戌入以丑未二旬而入晨候之東方夕候
之西方一歲而周天



通志卷三十九



總校官庶吉士臣侍朝

校對官編修臣裴謙

謄錄監生臣倪時慶